



**Vademecum Sive Praxis Opera Quotidiana Aliaque ritè  
peragendi, & per ea salutem & perfectionem propriam, ac  
proximi, instituto Societatis Jesu conformem assequendi**

De crebrâ per diem mentis in Deum elevatione ex omnibus, quæ per  
sensus attinguntur, animæque potentiis se objiciunt

**Limpens, Ferdinand**

**Coloniæ Agrippinæ, 1744**

De Cultu sanctorum.

---

---

**Nutzungsbedingungen**

[urn:nbn:de:hbz:466:1-54773](https://nbn-resolving.org/urn:nbn:de:hbz:466:1-54773)

Act. ubi legitur, quòd Petrus agnoverit se ab Angelo ex carcere eductum, & quòd, cum pulsaret januam, primò aliqui non crediderint esse Petrum, sed dixerint : *Angelus ejus est.* Inde Chrysoft. aliique PP. rectè denuò ingerunt, communem semper fuisse opinionem fidelium, cuique homini à prima nativitate Custodem Angelum Calitibus adjungi ; imò & tunc modò persuasionem fuisse multis ex post historiis confirmatam, quòd Custodes Angeli clientum suorum subinde speciem vel personam induant, quòd Angeli etiam in figura humana homines Deo caros protegant, alia prætereundo, patet ex lib. 2. Machab. c. 10. ubi legis sequentia : *Cum vehemens pugna esset, apparuerunt adversariis de calo viri quinque in equis frœnis aureis decori ducatum Judais præstantes, ex quibus duo Machabeum medium habentes armis suis circumseptum incolumem conservabant, in adversarios autem tela & fulmina jaciebant. Interfecti sunt autem viginti millia quingenti & equites sexcenti.* Sic I. 4. Reg. c. 19. *Angelus Domini percussit in castris Assyriorum centum octuaginta quinque millia in una nocte.* Ergo Script. ratio sensus communis omnium fidelium nil clamat aliud, quàm Angelos colendos esse, ut Dei amicos & nostros parronos.

*De Cultu Sanctorum.*

**Q**uia Christus Matth. 22. dicit beatos fueros sicut Angelos, & Matth. 25. vocat illos *bene-*

*benedictos Patris sui, & Deus vult, ut à probis hominibus adhuc viventibus quæramus pro nobis apud ipsum intercessionem, sicut Paulus idè ad Coloss. 4. & 1. Thessal. 5. dicit: Fratres, orate pro nobis. Quid obstat, quò minùs Sancti in cælo Angelis similes faciem æterni patris, cujus benedicti vocantur, videntes & pro nobis apud Deum intercedentes à nobis honorentur & invocentur, qui propter has ipsas intercessionès plurima nobis confert bona. Hec omnia in clarissimis & plurimis habes S. Script. locis, v. g. Gen. 48. Jacob nepotibus suis Josephi filiis benedictionem elargiens hâc precandi formulâ utitur: Deus qui pascit me ab adolescentia mea usque in presentem diem, Angelus, qui eruit me de cunctis malis, benedicat pueris istis, & invocetur super eos nomen meum, nomina quoque Patrum meorum Abraham & Isaac. Deus Ezechieli 4. Reg. 19. promittit, se urbem Jerusalem protecturum propter David servum suum, tres pueri ad ignem condemnati Dan. 3. ità orant: Ne quæsumus auferas misericordiam tuam à nobis propter Abraham dilectum tuum, & Isaac servum tuum, & Israel Sanctum tuum. Onias & Jeremias vitæ sanctitate conspicui jam pridem vitâ functi orant Deum pro populo Judæorum. 2. Machab. 15. S. Petrus Apostolus à Deo edoctus se brevi ex vita migraturum in Ep. 2. c. 1. dicit: Dabo operam frequenter habere vos post obitum meum, ut horum memoriam faciatis. Hoc est memor ero vestri apud Deum orando pro vobis, ut horum monitorum meorum vic-*

cissimam memoriam & praxin habere vos faciat. Unde interpretes Chrysoft. aliique SS. Patres inferunt; cum tantam curam gerat S. Petrus, aliique Sancti in cælis Ecclesiæ in terris, meritò eos à nobis honorari debere, & hinc à primis Christianitatis temporibus fideles Martyrum, & sanctorum hominum morientium se commendabant patrocínio, ut in cælos recepti pro ipsis apud Deum intercederent. In hac fide S. Cyprianus ad Corneliū Papam scribens l. 1. Ep. 1. dicit: *Si quis nostrum prior divina dignationis celeritate precesserit, perseveret apud Deum nostra dilectio, pro fratribus & sororibus nostris apud misericordiam Patris non cesset oratio.* In hac fide mortui sunt fideles omnes, & SS. Patres. Qualis autem impudentia Ministelli cujusdam Calvinistæ audentis effutire? SS. Patres hac in materia suæ Theologiæ oblitos eloquentiam suam hyperbolis ostentare voluisse. Verum, quòd unus Mediator & Advocatus sit Christus apud Patrem semper interpellans pro nobis supremus scilicet & primarius per excellentiam & eminentiam omnimodam, cujus pretiosus sanguis dignificare debet Sanctorum, & in hac & in altera vita intercessionem ac preces pro nobis, inde tamen non sequitur, quòd fidelis in hac vita & viventium & mortuorum sanctorum hominum intercessionem apud Deum quærere non debeat, eosque tanquam Advocatos secundarios honorare & invocare. Ipse Deus rem totam decidit Job. 42. ubi dicit ad Eliphaz Theraanitem: *Iratu est furor meus in*

te & in duos amicos tuos, quoniam non estis locuti coram me rectum, sicut servus meus Job: ite ad servum meum Job, & offerite holocaustum pro vobis, Job autem servus meus orabit pro vobis, faciem ejus suscipiam, quo ab ipsis facto suscepit Dominus faciem Job pro iis intercedentis, quid clarius dici potest? Calvinista non potest oggerere, fideles viventes posse mereri pro aliis utpote necdum in termino constitutos; quia ipse in suis principiis libertatem consequenter & meritum negat, sed non agitur hic de merito, sed quod Deus velit honorari à nobis Sanctos, & apertis declarat verbis propter intercessionem Oniæ, Jeremiæ Abraham, Isaac, Jacob, David, &c. se hæc illa præstare beneficia. Impius est sermo Hæreticorum cavillantium Sanctos nec habere aures ad nos audiendum, nec perspicillum ad videndum. O nugatores sacrilegi! potuitne Abrahamo existenti in limbo [ V. c. 16. Luc. ] innotescere Epulonem prosperitate suâ abusum esse; & Sancti in cælo non poterunt cognoscere necessitates nostras? Elisæus in hac mortali vita in corde suo vidit absens Giezi servum suum duo talenta argenti & vestes mutatorias accepisse à Naaman Syro, 4. Reg. 5. & Sancti eodem illuminante Deo nil poterunt videre è cælo? V. Aug. l. 22. de Civ. Dei c. 29. Si vis scire modum, ecce quadruplicem. Primo possunt videre necessitates nostras aut preces ad eos in amplissimo speculo divinæ essentiæ, cujus intuitu perfrunntur, vel etiam eas intelligere ex speciali Dei revelatione; si enim

multa revelavit Deus Prophetis in terris; cur id non faciet in cælis, & quomodo sine scientia, quid agatur in terris, possunt 24. *Seniores offerre orationes Sanctorum?* Apoc. 5. 2dò. Sancti de necessitatibus aut precibus nostris ad eos fufis possunt certiores fieri mediantibus Angelis è cælo ad terram, & à terra ad cælum teste S. Script. commeantibus. 3tio. Per relationem animarum in Christo defunctorum, & ad cælestem gloriam admissarum. 4to. Potest intellectus Sanctorum incredibili quâdam subtilitate à Deo donatus nostra cognoscere. Hunc 4tum modum V. in Ep. Augustini ad Evodium in relatione admirandæ cujusdam visionis Genadio Carraginensi medico factæ. Demum si preces aut necessitates nostras non semper viderent aut perciperent Sancti in cælo, nunquid tamen Deus ob Sanctos à nobis invocatos velut apud ipsum intercessores nos exaudire potest, & sæpè exaudit? nunquid ipse clarè in Scriptura toties protestatur, se ob ipsos aut eorum intuitu, quibus dixit: *Dii estis vos*, & quos à nobis ut amicos suos honorari vult, hæc illa beneficia præstare mortalibus? vide plura huc facientia Tom. 3. Ludovici de M. snille S. J. Doct. & disciplinæ Eccles. l. 34. à pag. 521.

*De donis votivis, cultu Reliquiarum, & Imaginum Sanctorum.*

**S**I David 1. Reg. 21. gigantis Goliathi gladium loco sacro dedicavit, cur non & similia armorum